



**Sikuki Nuuk Havn-imi terminalissami nappaanersiornermi Ineqarnermut  
Sanaartornermut Attaveqaqatigiinnermullu Naalakkersuisup, Knud Kristiansen-  
ip, oqalugiaataa**

Asasakka tamassi,

Ulloq manna sivisuumik qilanaarisimavara, taamaattumillu Sikuki Nuuk Havn-imi terminalissami nutaami nappaanersiornermi maani nikorfasinnaagama nuannaarpunga tulluusimaarlungalu.

Tamassi nalunngisassitut suliaq manna, Nuummi Kalaallilu Nunaanni umiarsualivimmi pisinnaasat annertusinissaannik pisariaqartitsineq annertusiarortillugu sivisuumik oqallisigineqarsimavoq piareersarneqarsimalluni.

Suliassap piffissamut aningaasaqarnikkullu sinaakkusiussatut pilersaarutaasut iluanni piviusunngortinneqarsinnaanera takusinnaagakku nuannaartorujussuuvunga.

Sulianut piginnaaneqarluarnek, pilersaarusiiornermi sanaartornermilu suliamut sunniuteqarsimasoq tamatumunnga takussutissaavoq, aammalu Namminersorlutik Oqartussat, Kommuneqarfik Sermersuup, Aarsleff-ip aamma Sikuki-p akornanni suleqatigiilluarnerannut uppersaataalluni.

Tamanna attaveqarnermut sulianut angisuunut ukiuni tulluuttuni Kalaallit Nunaanni piviusunngortitseqataasussatut neriunartoqartillugu Ineqarnermut, Sanaartornermut Attaveqaqatigiinnermullu Naalakkersuisutut isumalluarfigilluarpara.

Sikuki Nuuk Havn atulerpat Nuuk aammalu Kalaallit Nunaat aalisarnerup, takornariaqarnerup aatsitassarsiornerullu iluani periarfissarpassuatsinnik atorluaanissamut piareersimanerulissapput.

Taamatutaaq silap pissusiata allannguutai nunani tamalaani umiarsuit angallannerinik allannguissasoq ilimanarluinnarpoq, tamatumalu kingunerisaanik siunissami umiarsuit amerlanerusut Issittup imartaani angalasalissapput. Attaveqaatit eqqortut atorlugit tamanna Kalaallit Nunaanni ineriartortitsinermik suliffissanillu pilersitseqataasinnaavoq.

Taamaattumik isumaqarpunga, Sikuki Havn maannarpiaq pisariaqartitsinnut piffissaagallartillugu iliuuseqarnermut takussutissaaginnangitsoq, aammali siunissami illoqarfiit pingaarnersaanni nunallu sinnerani ineriartortitsinissap

annertusaanissallu qularnaarneqarnissaanut siumut isigisinnaassuseqarluarnermut takussutissaasoq.

Ineqarnermut, Sanaartornermut Attaveqaaqatigiinnermullu Naalakkersuisutut Sikuki-p pilersitsiviulluartumik suleqatiginissaanut qilanaarpunga. Ataatsimoorluta Sikuki Nuuk Havn-ip Nuummi umiarsualivittut containerersorfittut nutaatut atorneqaannarani, aammali Kalaallit Nunaannut Isaavittut, nunap sinnerani annertusaanermik suliffissanillu pilersitseqataaffiusutut atulernissaanut atugassarititaasunik pitsaanerpaanik qulakkeereqataaffigissavarput.